

八

編

類

纂

八編類纂卷之九十七

函史編

天類

晉

上

自黃帝創受河圖始設霧臺立天地神祇物類之官使羲和占日常儀占月車區占星氣伶倫造律呂大撓作甲子隸首造筭數容成總六術以考定氣運天以六節地以五制司天氣者六期爲備終地紀者五歲爲周五六合者三十歲七百二十氣爲一紀六十年四百四十氣爲一周於是因五量治五氣起消

息察發歛以作調歷而是歲己酉十一月朔旦日南至而得寶鼎焉乃迎日推策時惠而辰從顓頊受之命南正重司天以屬神北正黎司地以屬人其後二官咸廢厥職而閏餘乖次益厭殄滅攝提無紀曆數失序堯首欽天復遂重黎之後不忘舊者使復典之而立羲和之官曆象日月星辰敬授人時命羲仲宅暘谷寅賓出日平秩東作日中星烏殷仲春爲春官命羲叔宅南交平秩南訛敬致日永星火正仲夏爲夏官命和仲宅昧谷寅餼納日平秩西成宵中星虛殷仲秋爲秋官命和叔宅幽都平在朔易敬致日短

星昴正仲冬爲冬官其命官之辭曰咨汝羲暨和莽
三百有六旬有六日以閏月定四時成歲允釐百工
庶績咸熙而萬世敬天授時之統紀在焉年耆禪庶
申戒文祖云天之曆數在爾躬舜亦以命禹由是觀
之王者所重也嗣是夏有昆吾殷有巫咸周則史佚
皆能宣明其事周官大司徒以土圭之法測七度正
日景以求地中本治曆之事占天而主日太史氏尸
之以正歲年叙事焉馮相氏掌十有二歲十有二月
十有二辰十日二十有八星之位辨其叙事以會天
位冬夏致日春秋致月以辨四時之序以世掌天文

之常曆天行歲歷一辰十有二歲而一周月於日會亦月歷一辰十有二月而一周辰則日月相會之次也辰十有日二玄枵曰娵訾曰降婁曰大火曰實沈曰鶉首曰鶉火曰鶉尾曰壽星曰大火曰析木曰星紀而二十有八星之位則日月所宿躔舍焉故歷者歷也歷日月星辰之歷次而正其經紀者也故曰天子置日官諸侯有日御以協三辰以和萬國至乎寒暑晦明陽陰生殺之數啓閉升降之紀消息盈虛之節皆應顯次而無淫流故能該浹生霑範圍大化極天人會和之盛周德既衰史不記時君不告朔故疇

人子弟分散或在諸侯或在夷狄其機祥廢而不統
魯哀公十年以建申之月爲建亥而怪蟬蟲之不
伏仲尼歎之曰火猶西流司曆者之過也周襄王二
十六年閏三月而春秋非之傳曰先王之正時也履
端於始舉正於中歸餘於終履端於始序則不愆舉
正於中民則不惑歸餘於終事則不悞蓋傷之也當
是時魯有梓慎晉有卜偃鄭有子韋齊有甘德楚有
唐昧趙有尹臯魏有石申皆掌著於天文圖驗之事
而甘石書迄于今宗之至於戰國並驚於強國禽敵
救急解分而已豈遑斯念哉是時獨有鄒衍明於五

德之傳述消息之分以顯諸侯秦滅六國兵戎極煩
又升至尊之日淺而自以爲獲水德之端正以十月
色尚黑也豈不謬哉漢興方剛紀大基正朔服色襲
秦而莫之能改是時北平侯張蒼主顓頊曆曆用之而
晦朔月見弦望滿虧未能睹其真至武帝元封元年
漢興百有二載矣大中大夫公孫卿壻遂太史令司
馬遷等言曆紀壞廢宜改正下御史大夫寬與博士
賜等議詔卿遂遷與侍郎淳于長星射姓等議建議等
奏不能爲筭願募治筭者造密度乃選治歷鄧平及
長樂司馬可酒泉候宜君二十餘人方士唐都巴郡

洛下縣與焉乃分東西立晷儀至漏刻以追二十八
宿相距於四方舉終以定晦朔分至驛離月行弦望
乃以前曆太初四千六百一十有七歲至元封七年
復得閼逢攝提格之歲仲冬十一月朔旦冬至日月
在建星太歲在子得初本星度於是都分天部閼邇
等其法以律爲宗曰律容一龠積八十一寸則一日
之分也與長相終長九寸百七十一分而中復三復
而得甲子夫律陰陽九六爻象之所從出也故黃鍾
紀元氣之謂律律者法也物莫不取法焉蓋以律轉
歷也與鄧平所治同於是察觀星度日月之行以推

筭如閏平法法一月之日二十九日八十一分日之
四十三先籍半日名陽歷先朔月生不籍名陰曆朔
而後月生而以陽曆朝諸侯王群臣便議上上使校
律曆官淳于陵渠覆校之陵渠言太初曆晦朔弦望
最密而冬至之夕日月如合璧五星如連珠乃詔用
鄧平所造八十一分曆罷廢尤疎遠者十七家遂下
詔以元封七年爲太初元年其後元鳳三年太史丞
張壽王言更曆非足詔使者鮮于安人治曆大中丞
麻光等二十餘人雜候日月晦朔弦望八節二十四
氣于上林清臺課諸曆疏密十一家盡六年而壽王

課采疏遠太初歷第一、卽墨徐萬旦長安徐禹治太
初歷亦第一、蓋自太初起歷盡元鳳六年三十有六
歲、而是非堅定、至孝成之世、劉向總六歷列是非、作
五紀諭、向子歆究其微眇、作三統曆、及譜之、以說春
秋推法密要、太極運三辰五星於上、元氣轉三統五
行於下、而皇極建三德五事於中、故三辰之合於三
統也、日合於天統、月合於地統、斗合於人統、五星之
合於五行也、水合於辰星、火合於熒惑、金合於太白、
木合於辰星、土合於填星、故歷三辰五星相經緯也、
太初歷在行百十年而曆稍後、天朔乃或在月晦、永

平中詔歷官張盛景防鮑鄴等以四分法與舊曆楊
岑課弦望而盛等所中多岑六事四分之術頗行至
元和而太初失天益遠章帝詔改行四分曆以九道
法候弦望無差而以庚申爲元其後竇誦邊韶馮光
等言曆元互異而議郎虞恭等以爲建曆之本必先
立元元正而後曆可從正也四分曆中紀之元與天
相應不可復尚若更三聖其元則上統開闢其數則
復古四分宜如故便而蔡邕亦以爲太初曆行百八
十九歲而章帝改從四分元用庚申行度密於太初
是新元效於今日也不宜改於是四分行如故當是

時儒者蘇况郎顗張衡蔡邕之倫並能參互天文而
衡爲太史令作渾天儀著霧憲以測天行又作候風
地動儀以測地動變自有載籍而來未有也永光中
正月十六日月有食而四分歷推以爲在二月疎闕
於是會稽東部尉劉洪悟以爲四分疎闕者以斗分
太多乃更以五百八十九爲紀法一百四十有五爲
斗分以冬至日在斗二十二度以追月及五星之行
推閏月推弦望沒推合朔之度推掛用事推五行用
事推加時漏刻皆依易立數名乾象曆蓋始悟月行
有遲速以日行課其疎密而日月黃道赤道表裏之

度益精大儒鄭玄受之以爲窮幽極微加注釋焉。三
國時蜀仍漢四分吳用乾象魏黃初本乾象法名景
初晉因之名泰始曆皆小益斗分求加之以爲名而
太元中姜岌造三紀甲子元曆悟以爲古曆斗分強
不可施於今乾象斗分細不可進於古景初近之而
日之所在猶差四度蓋日所在之度難知漢世惟驗
諸昏明中星爲法已闕於是卽月食度分以其衝知
日度所在而躔次乃得其正然終晉之世惟獨用泰
始曆而三紀甲子曆與李修十顯所造乾度曆皆不
果施行宋元嘉中前歷合朔不在朔月食不在望宋

何承天悟以爲朔望弦贏縮不辨知也於是卽朔弦
望皆定大小餘正朔望之日更測中星知堯時冬至
日在須女十度舊曆在斗十七度今測景所驗乃當
在斗十三四度於是新立法冬至徙而上三日五時
日視舊移四度以定氣至名元嘉曆自宋迄齊循用
之不改然當其時祖冲之世天官覺其失考古法爲
甲子元曆未上梁天監中冲之子散騎常侍暅疏上
之具言先臣在晉仰尋十二代曆曆元不同斗分疏
密疎異當代用之各垂一法而不能相通譬之家異
權度卽輕重長短不得不隨異也夫斗分者日月初

運星辰之紀也。日月合朔於此而萬物潛萌。此律曆之所起也。故命曰星紀。甄曜度及魯曆。南方有狼狐而無東井。北方有建星而無南斗者。以周天二十八宿。惟斗井二宿爲度最多。故月令昏旦中獨卽狐建星以爲的。而斗分難詳。今以元嘉曆測冬至斗分日月所在。覺差三度。而二至晷影差幾一日。諸五星伏見尤舛。詔太史以曆所上曆與舊曆對課疏密。冲之歷皆密。而大明曆遂行。亦曰甲子元曆善乎杜征南預作春秋長曆推言之也。其言曰。天行不息。日月星辰各運其舍。皆以其象動者也。新故相涉。固不容無毫末。

之差積久而差遂失晦朔則不得不改憲以從之亦其理也易於革繫之曰君子以治曆明時革之言更也言當隨時更革順天以求合而不當爲合以驗天至哉言乎則知造歷之初人矜其智自謂精耿更相疵謗以爲名高何言之頗也其在北元魏至隋歷凡數變行之數十年輒差至齊宋景業援圖讖作天造曆逆以爲文宣受命之符道士張賓稱曆數有代謝之徵逢隋祖造己巳元曆則其舛無惑也是時劉孝孫劉焯條駁賓歷紕謬者六事忤上意見絀久乃召用而張胄玄所造大業曆乃行唐終始二百九十餘

年而曆凡八改。武德初，傅仁均所造曰戊寅元歷。行之盡一年而月食比不效，乃詔崔善爲、祖孝孫等考定之。至高宗時而疎。太史令李淳風作麟德歷，以獻其法。楊益中晷術以考日爲本，渾圖以測黃，當時以爲密。詔與太史令瞿曇羅所上經緯歷參行。至開元中日蝕復比不效，於是詔僧一行作新曆。蓋自太初至麟德，凡二十有三家矣。而一行所爲曆，其倚數立法，皆本易大衍而立術以應之，蓋以易轉歷也。盡七年，較經史所書氣朔日行宿度可考者，皆合而歷成。其合朔議言日月合度謂之朔，無所取之，取之極

也春秋所書日食參左傳所記注其下繫以列國之事蓋列國之赴告也列國赴告不一則其曆有不可以一術齊者矣故合朔先天則經書日食以糾之中氣後天則傳書南至以明之其在晦日若二日則原于定朔以得之列國曆殊則稽六家之術以知之此四者治曆之大端也長曆其日不在其月則改易閏餘以求合此甚謬也新曆本春秋日食古史交會加時及史官候簿所詳稽其進退之中以立常率然後以日躔月離先後屈伸之變而損益之故經朔與躔離三者迭相爲經若權衡相持而千五百年之間朔

必在晝望必在夜其加時又合則三術之交各當其正若乾度盈虛與時消息告謹於經數之表變常於潛遯之中則雖聖人然且不質非籌曆之所能及矣大都古曆分率簡易歲久輒差達曆數者隨時遷革以合其變故三代之興皆揆測天行考正星次爲一代之制正朔旣革而服色從之及繼體守文疇人代嗣則謹循先王舊制而密行焉固其理也春秋啓蟄而郊龍見而雩以歲差推之周曆立夏日在觜觿二度昏角一度中則龍見當在建巳之初至春秋時已潛退五度猶在建辰之月據麟德曆以小滿後十三

日而雲則龍角過中不時矣故唐禮當以建巳初農
祥始見而雲傳曰凡土功龍見而戒事火見而致用
水昏至而栽日至而畢以歲差推之周初霜降日在
心五度角亢晨見立冬火見營室中後七日水星昏
正可以興板榦故祖冲之以定之方中直營室八度
爲得時也據麟德曆立冬後二十五日火見大雪後
營室乃中其時陽氣靜復而以之繕城隍治宮室是
發天地之房所失多矣則唐制宜以玄枵中天興
土功又其日蝕議言詩云彼月而食則維其常此日
而食子有不戒日君道也無朏魄之變月臣道也遠

日益明。近日益虧。望與日軌相會。則徙而浸遠。遠極。
又徙而近交。書曰。乃季秋月朔辰弗集于房。集言輯。
也。日月嘉會。而陰陽輯睦。則陽不疚于位。以常其明。
陰含章示冲。以隱其形。是輯也。望而正於黃道。是謂
臣子君陽。斯食之矣。朔而正於黃道。是謂臣壅君陽。
爲之食矣。且十月之交。於曆當餚。而詩人悼之。何也。
以爲古太平之世。日不蝕。星不孛。蓋有之矣。若過至
其分。月或變行而避之。或五星潛在日下。禦侮而救
之。或涉交數淺而不食。或在陽曆陽盛。陰微而不食。
此四者。皆德教休明之所由生也。故近古大儒劉歆

賈逵之偷詐不知四序分同道至相遇則交而有食
歲以日蝕非常故闕而不諭也黃初已來治曆者始
以密率而課夫日蝕之疎密是專於曆紀者也使日
食而不可以常數求則無以課曆數之疎密使日食
而皆可以常數求亦何以占政教之休咎哉其五星
議言日月所以著尊卑不易之象五星所以示政教
從時之義也故日月之失行也常微而少五星失行
也常著而多其五星留逆伏見之效表裏盈縮之行
皆係之於時而象之於政者也政小失則小變大失
則大變事微而象微事章而象章所以示吉凶之象

也而又有變行改其常度與人事相爲俯仰而神理從效焉不然則皇天何以陰隲下民而警悟乎世主哉近代筭者昧於象占者迷於數觀五星失行則皆謂之曆舛雖七曜循軌或猶以謂天災是以數象相蒙而兩乖失實也故較曆必稽古今注記入氣均而行度齊上下相距反覆相求以初爲常而以其獨異於常者爲占凡二星相近多爲之失行三星以上失度彌甚天竺曆以爲五曜之精皆有所好惡遇所好之星則趣之趣之行疾捨之行遲凡皆精氣相感故五星各立歲差以究五精之運而周二十八舍之

變曆成而一衍卒詔特進張說與曆官陳玄景等次爲曆術七篇畧例一篇歷議十篇上之頒于有司時善爲筭者即皆曇譏怨不得與與玄景等言大衍獨術天竺九執歷而其法未盡太子右司禦南宮說亦非之詔侍御史李麟合日官於靈臺課候大衍十得七八麟德纔三四而是非定肅宗時用山人韓穎言更歷節增二日爲至德歷而不與天合寶應元年臺官郭獻之等更歷曰五紀考五星進退偶合詔頒用迄建中又變曰正元元和又變曰觀象自是嗣世續繙必更曆紀然皆因大衍舊術於晷漏交會稍稍增損

之以爲名其制法簡易合望密近則宣明爲然遂以
遵用至昭宗時少詹事邊嗣與日官更造崇玄曆剛
巧筭能馳驟反覆於乘除之變而簡捷超徑非復本
初意矣初唐建中時術者曹士鳴始變古法以顯慶
五年爲上元以雨水爲歲首號符天曆世易之稱小
曆頗行於民間曆家不道也五代初曆因唐用崇玄
至石晉時馬重績本士鳴法更造曆不復推古上元
甲子冬至七曜之會而以天寶乙未爲上元雨水爲
歲首其法遂施於朝廷號調元曆行五年輒差不可
用而崇玄曆復行至周世宗始詔更造歷而端明殿

學士王朴通曆數，於是步日步月步星步發歛，著爲書四篇。上之世宗詔頒用。口欽天曆而朴曆自成一家。言其法總日曬差次爲盈縮二曆，分月離遲疾爲二百四十八限，以考衰序之漸，以審朏朒而正朔望，按赤道九限，更其率數，以步黃道，分黃道八節，辨其内外，以揆九道，使日躔有常度，月行如循環，而二曜以協觀，天勢之升降，察軌道之斜正，以制金差，而交會密，測岳臺之中晷，辨二至之日夜，以刻曬離，而晷漏精，推星行之逆順，伏留使舒亟有漸，而五緯齊，宋初承用，名應天曆，而差未幾改。乾元曆行之亦又

差繼作者曰儀天曰崇天曰明天曰奉元曰觀天曰
紀元逮靖康丙午百六十餘年而曆凡八改南渡後
有作曰統元曰乾道曰淳熙曰會元曰統天曰開禧
曰會天曰成天又百年歷亦復八改元承用金曆
歲久寢疏世祖欲釐正之命王恂楊恭慈郭守敬領
其事恂等言曆家知曆數而不知曆理願得通天道
精曆理大臣如許衡者總之歷宜精於是命衡領太
史院而是時守敬於曆象特精諸曆事受成焉當是
時守敬言司天莫大於測景古今曆以唐一行所造
大衍爲稱首則以唐開元間令南宮說行天下測景

所歷地最廣也。今宜遣使者四往測景，成一代之制。
而測驗莫先於議表。今司天儀本宋皇祐中於汴京
所造，於大都天規環不協，比量南北極差四度有奇。
又表石年深欹側難適用，請別創儀表相比覈，宜可
精。於是創間儀、仰儀及諸儀各臻其精妙，以爲天樞
附極而動，管人嘗展管候之宿度餘分，終未得其的。
用二線測餘分纖微可考，作候極儀。極辰旣位，天體
斯正，作渾天儀。儀象形似，莫適於用，作玲瓏儀以表
之。矩方測天之正閒，欲合也，實難法，當以圓求圓，作
仰觀儀。古有經緯儀，相連絡而不動作新儀。東西運

轉南北低昂而七政列舍中外官去極度分燥然作立運儀日有中道月有九行用爲測驗其致一也作證理儀表高景虛圖象非真作景符月雖有明測景則難作闡幾曆法之驗在於交會作日月食儀天有赤道輪以當之兩極低昂標以指之作星晷定時儀諸皆創以意爲之又作仰規覆矩圖異方渾蓋圖日出入永短圖與諸儀互參驗而彌精於是設監候官十四人分道行測景東至高句驪西極滇池南踰朱崖北盡鐵勒凡二十七所而守微作懸正儀坐正儀令行四方測景者用之仰察疆域近取晷景微入刻

抄遠周察海偏參曆法酌稽中數。蓋五年而曆成衡
守。敬具疏言天體難測古曆家於天往往各有測悟。
而未備精察今創以新儀木表與舊儀所測較得數
歲冬至晷景及日躔所在若月離遲速與列舍分度
之差自大都校北極出地高下之度。因時晝夜刻之
長短叅古制立新法非假測悟一本其故常考正者
七事創法者五端非敢謂能然方之前代全~~此~~故曆
增損傳會爲法者較然易知誠得每歲測驗脩改積
三十年庶幾可使如三代日官世專其職其驗氣法
曰天道運行如環無端治曆者必就陰陽消息之際

爲之法而始於候景候景之法不過植表測景以究其氣至之始而已知作能述前法略備而植表已短尺寸之下所爲分杪大少未易分別表長則分寸稍長而晷景虛淡難得其實人於虛景之半或設望筒或置小表或以木爲規皆取表端日光下徹圭面然皆其浮陽之數非足準也今以銅爲表高三丈六尺端挾以二龍舉橫梁一由表端下至圭面爲四十尺於古八尺之表一寸引伸之爲五卽毫釐易分而別制景符取實景其制以銅葉博二寸長加博之二中穿一竅若針芥以方闊爲趺其一端設機可開闔欹

其一端使斜倚北高南下往來遷就於虛景之中審
達日光如米許隱然見橫梁於其中蓋舊以表端測
晷所得者日體浮邊之景今以橫梁取之慎其中景
也古地中八尺表景冬至長丈三尺有奇夏至尺有
五寸今京師表冬至景長七丈九尺八寸有奇在八
尺表爲丈五尺九寸六分夏至景長丈一尺七寸有
奇在八尺表爲二尺三寸四分雖晷景長短以時地
頗異而景長爲南至短爲北至其揆一也至日氣正
則一歲氣節從正矣而氣至時刻攻求不易劉宋祖
冲之嘗取至前後二十三四日間晷景折取其中用

之定爲冬至且以日差比較推定時刻諸曆因之加詳今以新儀自丙子冬至累日月測驗至己卯冬至三歲中前後日率相埒者參攷同異定擬二至時刻減大明曆十九刻二十分以上考春秋而來冬至無不盡合其歲餘歲差法曰周天之度自今歲冬至距來歲冬至歷三百六十有五月而日行一周凡四周歷千四百六十日而餘一日析而四之則四分之一也然天之分常有餘歲之分常不足惟所差至微世曾莫知漢劉洪始覺冬至後天謂歲周餘分太強乃減去餘分二千五百爲二十四百六十二至晉虞喜

宋何承天祖沖之謂歲當有差立歲差之法損歲餘益天周使歲餘浸弱天周浸強強弱相減因得日曆歲退之差則歲餘天周實相爲用也今損益稍失其當詎能與天協哉今自劉宋大明壬寅以來凡測景驗氣得冬至時刻真數者六家取相距積日時刻以相距之年除之各得其所用歲餘復自大明壬寅距至元戊寅積日時刻以相距之年除之得每歲三百六十五日二十四分二十五秒比大明曆減一十一秒定爲今所用歲餘之數益所謂四分度之一者爲三百六十五度二十五分定七十五秒爲今所測天

周餘分強弱相減餘一分五十秒用除全度得六十六年有奇日即一度以六十六年除全度適得一分五十秒定爲歲差之數復以堯典中星攷之其時冬至日在女虛之交及考前史漢元和二年冬至日在斗二十一度晉太元九年退在斗十七度宋元嘉十二年在斗十四度不梁大同十年在斗十二度唐開元十二年在斗九度半今退在箕十度取其距今之年距今之度參驗之多者七十餘年少不下五十年則差一度宋慶元乾天曆取大衍歲差率八十二年及元所距之差五十五年折其中得六十七年爲日

道交周之故固可得焉天有九道當二極南北之中橫絡天體以紀宿度者赤道也出入赤道爲日行之軌者黃道也其白道與黃道交貫者月行之所由也古人分八行與黃道而九蓋以其隨交遷徙變動不居故強以其方之色名之其究一也月道出入與日道交值當朔則日爲月所掩而日食當望則月爲日所衝而月食其涉交有遠近則食分有深淺皆可以數推之所謂交周者月道出入日道一周之日也月道距赤道遠爲度二十有四月道出入日道不踰六度其距赤道也遠不過三十度近不下十八度出黃

道外爲陽入黃道內爲陰陰陽一周分爲衆限者四
月當黃道爲正交出黃道外六度爲半交復當黃道
爲中交入黃道內六度爲半交是爲四象限限爲七
交各行九十一度周歷四象爲一交得二十七日二
十一刻二十二分二十秒每一交退天之一度二百
分度之九十三凡二百四十九交退天一周有奇終
而復始正交在春正半交出黃道外六度在赤道內
十八度正交在秋正半交出黃道外六度在赤道外
三十度中交在春正半交入黃道內六度在赤道外
十八度月道與赤道正交距春秋二正黃赤道正交

宿度東西不及十四分度之二夏至在陰曆內冬至
在陽曆外月道與赤道所差者多夏至在陽曆外冬
至在陰曆內月道與赤道所差者少蓋白道二交有
斜有直陰陽二曆有內有外直者密而狹斜者疎而
闊其差亦從而異今立象置法求之差數多者不過
三度五十分少者不下二度三十分夫曆法疏密驗
在交食而推步爲難加時必本於躔離朓朒考求入
加時必本於躔離朓朒考求食分必本於距交遠近
苟入氣盈縮入轉遲疾未得其正則合朔不失之先
必失之後矣合朔失而欲交食之無失不可得也今

日躔縮遲速與白道交周之度、咸極於微眇則合朔正合朔正則加時無早晚加時無早晚則食分無強弱其二十八宿距度自太初曆來代損益不同皆以意牽合未嘗實測其數今新儀細刻周天度分每度爲三十六分中爲直距以兩線代管窺距度餘分得實測無牽就其日出入晝夜刻舊曆據汴爲準於大都不同今以大都北極出地高下黃道出入外內度立法推算日出入晝夜刻得夏至極長出寅正二刻入戌初二刻冬至極短日出辰初二刻入申正二刻以爲常諸推步之式與見成之數皆比次篇類整

齊分秋爲成書皆視古加密而去諸曆積年月日爲法之傳會者一本諸天道之自然以爲曆法之作凡以步日月之躔離候氣朔之盈虛而已不揆其端固無以測知天道而與之脗合然不驗之近亦何自知其本順以動而一無所強哉昔人立法必推求上古至之日日月合璧五星連珠爲上元以是爲曆之本始千歲之日至日至合而後曆可從定也

高皇帝聞括蒼劉基名聘至都禮遇之以爲太史令吳元年基率其屬造戊申大統曆以上洪武初召集天下通知律曆名家者赴京議曆法古天象三年立

欽差天設官凡玄象圖書非其職不得習其習業者分四科曰天文曰漏刻曰大統曆曰回回曆自五官而下至天文生各專科肄焉五官正理曆法造曆歲造大統曆御覽月令曆六壬遁甲曆御覽天象七政躔度曆上之凡曆註上曆三十事民曆三十二事壬遁曆六十七事霧臺郎辨日月星辰之躔次分野以古候保章正專志天文之變辨吉凶之古擎壺正知漏孔壺爲漏浮箭爲刻以考中星昏明之度而統於益正上與羣臣論天日月五星之行翰林應奉傳藻輿藉黃麟等以蔡傳右旋說對上怒曰是儒

家說渠何知天、左旋日月五星右轉二十八宿經也。
附天體不動日月五星緯也。必右旋朕自起兵來與
善推步者仰觀今二十有三年矣。夜指一宿爲主度。

太陰所距初幾何盡一夜卽漸過而東非右旋而何。
十七年製觀星盤大明清類天文分野書書成賜秦
晉燕周楚齊六王。俾讀焉是歲博士元統言臣聞一
代之興必有一代之曆隨時修改以合天今曆以大
統爲名而積分猶踵授時之數非所以重始敬正也。
授時法以至元辛巳爲曆元至洪武甲子積一百又
四年經云大約七十年而差一度今年遠數盈天數

漸差、請以洪武甲子歲冬至爲大統曆曆元而七政之行有遲疾順逆伏見之不齊其與未易知臣聞磨勘司令王道亨郭伯玉精九數之學願徵令推筭以

宣昭一代制書奏上報可擢統爲監正十八年築欽

天監觀星臺於鷄鳴山其回回歷觀星臺因雨花

臺之舊棲焉令隔遠母及通二十年選疇人年壯解

書者赴京習天文推步之術而監副李德芳言授時

曆推往古每百年長一日下推將來每百年消一日

卽永久不可易也今監正統所造曆改不用消長之

法非是統疏爭以爲推步合舊法

上自二統皆

難憑獨驗七政交會行度無差者爲是於是欽天監以洪武甲子爲曆元而造曆依授時法推算如初二十年革回回監正統中造己巳曆頒行之而疎尋廢不行學士楊廉言漢興四百年更三造曆唐三百年更七造曆宋三百餘年至十八造曆本朝自洪武至今百四十年未更造而交食一一驗不爽則知許平仲郭守敬所造理數精極古今曆無過之者正德中禮部主事鄭善夫以歲中月食者三奉命往觀象臺督監官驗候以爲新舊法互有失得願徵海內究心天文之學及能爲筭者使得盡心更元定曆之事其

不智

說主筭極於秒微、以至於半秒難分之所、積之無差、而後精、善乎元儒金履祥之言曰、帝典之言天寬而曆常密。後世之言天密而曆常疎。典命義和於中星互舉辰象於期數槩舉全日宜若已寬然不知彼治其要而隨時占候以爲固有司之事無所用數數爲也。後世日不足而爲度、度不足而爲分爲秒分益碎、積算愈難、而卒又未嘗不差、則何益矣。語曰、銖銖而稱之至石必謬寸而量之至丈必差、况天行無方體而欲以數盡窮之乎、誠窮之亦何益於修省之實矣。

八編類纂卷之九十八

函史編

天類

曆

幽王益貪天禍、不憇其心而怨其正、內嬖褒姒、外狂
師尹、君子獨處守正、反見讒懃、立二年而西周三川
皆震、伯陽甫傷之曰、周將亾矣、夫天地之氣、水土演
而民用之者也、陽伏而不能出、陰迫而不能蒸、於是
乎有地震、是陽失其所而填陰也、陽失而填陰、原必
塞、原塞國必亾、昔伊洛竭而夏亾、河竭而商亾、今周

德若二代之季矣、得無亾乎、春秋傳曰、二至二分日有食之、不爲災、日月之行也、分同道也、至相遇也、其它月則爲災、陽不克也、故常爲水、然日過分而不克、克必甚、亦且必爲旱、故禮三辰有災、百官降服、君不舉、而辟位、瞽奏鼓、晉夫馳、庶人走、祝史用幣辭焉、曰、炤炤大明、燄滅無光、柰何以陰侵陽、以卑于尊、其鼓用牲于社、書非禮也、諸侯用幣于社、伐鼓于朝、故日食、王者重之也、李之言茀彗、所以除舊而布新也、彗出東井、齊侯以爲憂、晏子曰、君高臺深池、賦歛如弗得、刑罰恐弗勝、孛星將出、彗何懼乎、由此言之、李甚

於星也。恒星不見夜中星隕如雨何記異也。恒星經
星也。日入星可以見而不見異也。星非雨而隕如雨
尤異也。隕石于宋五隕星也。大水陰盛火陽亢也。水
爲女婦淫兵連起百姓愁怨火爲君不思道好內而
聽謾也。其雨雷震雹木米皆以非時而書地震金木
水火沴土也。臣事雖正專必震其震於水則波於木
則搖於屋瓦解於丘陵涌水出爲易臣搖政爲無德
專政爲臣弑逐君六鶴退飛風也風發而高疾鶴逢
之而退飛常風之罰也。宋災晉侯問災故於士弱士
弱對曰古之火正或食於心或食於味味爲鶴火心

為大火以出納火也。陶唐氏之火正閼伯居商丘祀
大火而以火紀時故商主大火。商人是因故閼商人
禍敗之黨必先於火。公曰可必乎？對曰在道國亂無
象不可知也。昭十七年冬有星孛于大辰及漢中須
曰彗所以除舊布新也。今除於火火出必布焉諸侯
其有火灾乎？梓慎曰往年吾見之是其微也。茲火出
而章必火入而伏其居火也久矣。火出於夏爲三月
商爲四月周爲五月夏數得天。若火作四圖當之。其
宋衛陳鄭乎？宋大辰之虛也。陳太皞之虛也。鄭祝融
之虛也。皆火房也。星孛及漢爲木祥衛顙堯之虛也。

星爲大水水火之牡也。共以丙子及壬午作乎水火所合也。當是時秦毒海內而刑峻天應之災日月薄蝕山陵淪亾。彗星四見久者八十日長或竟天。辰星出於四孟太白出經天無雲而雷柱矢夜光熒惑襲月他若孽火燒宮野禽戲廷長人見臨洮石隕東郡此暴秦作難激以張楚之異也三十年之間兵相駘籍禍烈於蚩尤項籍救鉅鹿枉矢西流山東遂合從諸侯西坑秦人誅屠咸陽嗚呼變亟疾極此矣漢元年五星聚於東井客謂張耳曰東井秦地漢王入秦五星從歲星聚之其占當以義致天下漢王旣入秦

不殺秦降王、軍霸上以待諸侯、與秦民約法三章、民無不降心、可謂行義矣、是天之所與也、三年秋、太白出西方、有光幾中、天乍北乍南、過期乃入於法秦地、得勝辰星、出四孟、爲易王之表、而項氏以滅、平城之圍、月虧闕、參畢、昴數重、昴爲匈奴、參爲趙、畢爲邊兵、熒惑守心、高祖崩、高后用事、諸呂亂、戾王爲戮、時則日食於衡、天東北裂、廣十餘丈、長二十餘丈、加以滅光星、見雨血之異、孝景時、吳楚七國之變、彗星長數丈、天狗過梁野、及兵起、遂伏尸流血其下、元光元狩間、蚩尤之旗再見、長則半天、後京師四出、誅夷狄者、

數十年而伐胡尤甚南越之凶熒惑守斗朝鮮之拔
星茀于河兵征大宛星茀招搖元光中天星盡搖上
以問候星者對曰星搖者民勞之應故庶民爲星也

當是時董仲舒治春秋學爲醇儒洞然於天人相與
之際於祥異與故尤深數數爲天子推明言之其治
國以縱閉求雨暘雨暘爲若昌邑王賀徵在位淫縱
大將軍光爲社稷計欲廢立計未有所定天久陰不
雨晝夜不見日月賀欲出畋光祿大夫夏侯勝當車
諫日久陰不雨臣下有謀上者陛下行欲何之賀怒
縛以屬吏吏白大將軍大將軍念與密畫者獨車騎

將軍急召車騎將軍安世諱讓之以爲泄語安世謝
無有召問勝勝以爲語出洪範五行傳中持示光光
安世讀之大驚以此益重經術士而王賀在固時嘗
自見犬白頸以上似人冠方山冠以問郎中令龔遂
遂曰此天戒言在側者皆冠狗也又見大熊左右莫
見以問遂遂曰山野之獸入宮室宮室將空此危凶
之象也先是昭帝元鳳初泰山萊蕪山南匈匈有數
千人聲民走視大石自立高丈五尺大四十八圍入
地深八尺三石爲足石立後有白鳥數千下集其旁
是時昌邑有枯社木澍復生又上林苑中大柳樹枯

卧地亦自立。生有蟲食樹葉。成文曰。公孫病已立。鄭
眭弘推春秋之意。以爲石柳皆陰類。下民之象。而泰山
者岱宗。王者易姓。告代之處也。今大石自立。僵柳
復起。非人力所爲。此當有故廢之家。從匹夫起爲天
子者。後五年。孝宣帝典於民間。卽位。地節元年正月
戊午月食。熒惑在角亢。占。憂在宮中。辛亥入氐。
氐。天子之宮也。其景寅客星見貫索。東北行入天市
垣。有隕。躬而霍氏以毒許后。故夷滅。元帝初。元闢東
大木。郡國饑。上下詔。江海波湖園池屬少府者。假貧
民。勿租稅。損膳減樂。省苑囿。諸宮館。稀御幸者。太僕

少府減食穀馬水衡省食肉獸明年二月戊午地震

夏齊饑人相食七月巴西地復震因赦天下舉直言

極諫之士中郎應奉奏封事臣聞人氣內逢則感動

天地天變見於日蝕星氣地變見於奇物震動所以

然者陽用其精陰用其形猶人之有五臟六體五臟

象天六體象地故藏病別氣色發於面體病別欠伸

動於形也今年太陰建於甲戌律以庚寅初用事歷

以甲午從春

孟康曰太陰在甲戌

十一月庚寅日黃鐘律初起用事

歷中

甲庚律得參陽性中仁義情得公正貞廉

按奉傳節說以爲北

方之音也亦音貪狼申子主之東方之情志也志存善職亥卯主之是乃王者忠于卿也南方之情志

也惡行處貞貧午主之西方之清喜也喜行寬大已酉主之是以王者吉年酉也唯奉能用之學者莫能

行矣姜曰甲庚皆三陽甲在東方爲仁百年之精歲庚在西方爲義戊爲公正寅午爲廉貞

也正以精歲木首王位日臨終時接律而地大震其

後連月久陰陛下明聖深懷要道燭臨萬方布德流

惠罷省不憊之用振篲救貧恩澤甚厚猶不能復陰

氣盛矣古者朝廷必有同姓以明親親必有異姓以

明賢賢今左右無同姓獨以舅后之家爲親異姓之

臣又疏二后之黨滿朝非特處位勢又恣奢侈呂霍

上官足以卜之甚非愛人以德之道又非長世之策

陰氣之盛不亦宜乎臣又聞未央建章甘泉宮才人

各以百數皆不得天性若杜陵園其已御見者臣子
不敢有言雖然太皇太后之事也餘諸侯王園與後
宮宜設定員出其過制者此損陰氣應天救邪之道
也今異至不應災將隨起其法大水極陰生陽反爲
大旱甚則有火灾惟陛下裁察不報明年夏四月幸
武園白鶴館災奉自以爲中上疏曰臣前上五際地
震之效曰極陰生陽恐有火灾不合明聽未見省茶
臣竊不自信今白鶴館以四月乙未時加卯月宿亢
災與前地震同法臣奉乃深知道之可信也願復賜
問卒其終始上復廷問以得失奉念漢興而來官室

言
任
故
不
殊

苑囿日增奢泰難供所由來已久不改其本難以末
正乃復疏言竊聞漢德隆盛在於孝文皇帝其時未
有其泉建章及上林中諸離宮館也未央宮又無高
門武臺麒麟鳳凰白虎玉堂金華之殿而天子躬行
節儉省罷繇役欲作一臺慶用百金重民財力廢而不爲故其時天下大和百姓洽足德流後嗣成帝卽位委政元舅大將軍王鳳王氏五族同日俱封而黃
霧四塞大異徵見上方精於詩書古文詔光祿大夫
向領校中秘書向乃集合上古以來歷春秋六國至
秦漢符瑞災異之記推迹行事連傳禍福著其占驗

此類相從各有條目。凡十一篇。號曰洪範五行傳論。
奏之天子心知向精忠爲鳳兄弟起此論也。然不能
奪王氏權。元延元年星孛東井蜀郡岷山崩壅江向
流涕太息曰管岐山崩三川竭而周亾岐山者周所
興也。漢家本起蜀漢今所起山崩川竭殆必亾乎懷
不能已復上奏極論併圖以上大射禮行有雉集於
廷登堂而雉又集太常宗正丞相御史車騎府已又
集未央宮承明殿中大將軍音曰天地之氣以類應
謹告人君甚微而著雉最聽察先雷聞聲故經載尚
宗雉雉之異今博士行禮之日大衆集會飛集於庭

歷三公之府及典宗廟骨肉之官然後入宮其宿留
曉告備具深切人道相戒何以過其後許皇后廢而
陽阿公主家歌兒趙飛燕與女弟並入宮大愛幸谷
永以涼州刺史奏事至京師事竣當之部上使尚書
問永受所欲言永對曰去年九月黑龍見東萊其晦
日食今年二月己未夜星隕乙酉日食六月之間大
異四發而二者同月始河平之際許班之貴傾動轍
灼不可上矣今之後起天所不饗什倍于前廢失法
度聽用其言驕其親屬縱橫亂政刺舉之吏莫敢舉
憲又以掖庭獄爲亂阱榜篋簷於炮烙主爲趙李報

德復怨反除白罪逮治正吏多繫無辜至爲人起責
分利受謝生入死出者不可勝數是以日食再既以
昭其辜王者必先自絕而後天絕之陛下棄萬乘之
至貴樂家人之賤事厭尚美之尊號好匹夫之卑字
崇衆儂輕以爲私客挺身晨夜烏集雜會醉飲吏民
之家亂服共坐沉湎嫖媠典門戶奉宿衛之臣執干
戈而守空宮公卿百僚不知上處積數年矣去高廟
初陵改作昌陵因下爲高積土成山反天地之性發
徒起役並治宮館重增賦歛發如雨費擬驪山役百
乾谿又廣財營表發冢墓截骸揚尸百姓怨恨上感

天和災異屢降饑饉仍臻饑死道路者以百萬數公
家無一年之畜百姓無旬日之儲上下俱匱無以相
救陛下誠發明聖之德昭然遠塞畏上天之威怒懼
危亡之徵兆蕩滌辟邪之意厲精致志專心反道放
絕群小克己復禮毋貳微行出飲之過以防迫切之
禍抑損椒房玉堂之盛寵除掖庭獄去炮烙刑以塞
天下之望寢初陵之作止諸營繕崇厲忠直放退殘
賊無使素餐之吏久乃厚祿以次貫行固執無違夙
夜孳孳屢省無怠成帝性寬而好文永每言事輒見
答禮至此對上上大怒使侍御史收永而皇太后與

諸舅以至親難言實推永使言因勸上納用衛將軍商覘上怒密摘永亟發之郡而敕過交道廐勿追而免後災異益數永遷北地太守當之官上猶使衛尉受欲言永復對語尤苦重以今歲日食元日三朝之會四月丁酉四方衆星白晝流隕七月辛未彗星橫天夫彗星極異也上精所生流隕之應殆爲饑變厥期不久內則爲深宮後庭將有驕臣悍妾之家將有徵悖卒起之敗北宮苑囿街陌之間臣妾之家將有徵舒崔杼之亂外則爲諸夏四方將有樊金蘇令陳勝項梁奮臂之禍可爲寒心徃年邵國被水者二十一

今年蠶麥並惡江河決溢郡國十五有餘百姓流散
大異較炳宜損常稅而有司奏請加賦甚謬經義逆
民心布怨趨禍之道綏和元年成帝卽位之二十有
六年也春正月熒惑守心時丞相翟方進相九歲矣
會郎齊麗善爲星言大臣宜當之上乃召見方進賜
冊責讓使尚書令賜上尊酒十石養牛一口進卽日
自殺上秘之遣九卿冊贈印綬賜乘輿秘器以葬親
弔數至禮賜異他相冀以塞變踰月上竟崩無繼嗣
立定陶王欣初曲陽侯根以大司馬輔政數虛已問
尋尋說根言書曰天聰明蓋言紫宮極樞通位帝紀

大微四門，廣開大道，五經六緯，尊術顯士。翼張舒布，
照臨四海，少微處士，爲比爲輔。故次帝廷。女宮在後
王者承天，賢賢易色，取法於此。天官上相，上將皆顯。
而正朝憂責甚重，要在得人。得人之效，成敗之幾，不
可不勉也。將軍一姓九侯，二十朱輪。漢興以來，臣子
貴盛，未嘗至此。夫物盛必衰，惟有賢友強輔，庶幾可
保身全宗。根深納之，會哀帝卽位，薦待詔黃門上使。
衛尉喜問災異，仍重之，故令毋諱。盡欲言，尋條對言。
易曰：懸象著明，莫大乎日月。日者衆陽之長，輝光所
燭萬里。同晷人君之表也。故日將旦，清風發羣陰伏。

君臨朝不牽於色。日初出炎以陽。君登朝佐不行忠直進。不蔽障。日中輝光。君德盛明。大臣奉公。日將入。專以一。君就房有常節。君不修道。則日失其度。曠昧。亾光。各有云爲於東方作。日初出時。陰雲邪氣起者。法爲牽於女謁。有所畏難。日出後。爲近臣亂政。日中爲大臣欺誣。日且入。爲妻妾役使。所營間者。日尤不精。光明侵奪失色。邪氣珥覲數作。本起於晨。相連至昏。其日出後。至日中間差瘡。小臣不知內事。竊以日視。陛下志操衰於始初多矣。其咎恐有以守正直言而得罪者。傷嗣害世。不可不慎也。惟陛下執乾剛之

德強志守度諸保阿乳毋其言悲辭之託斷而勿聽
勉彊大誼絕小不忍良有不得已可賜以貨財不可
私以官位誠皇天之禁也日失其光則星辰放流陽
不能制陰陰桀得作間者太白正晝經天宜隆德克
躬以執不軌臣聞月者衆陰之長消息見伏百里爲
品千里立表萬里連紀妃后大臣諸侯之象也朝曉
正終始弦爲繩墨望成君德春夏南秋冬北間者月
數以春夏與日同道過軒轅上后受氣入太微帝廷
揚光輝犯上將近臣列星皆失色厭厭如滅此爲母
后與政亂朝陰陽俱傷兩不相便外臣不知朝事竊

見天文卽如此近臣已不足杖矣屋大柱小可爲寒心唯陛下親求賢士無疆所惡以崇社稷尊強本朝臣聞五星者五行之精五常司命應王者號令爲之節度歲星主歲事爲統首號令所紀今失度而盛此君指意欲有所爲未得其節也又填星不避歲星者后帝共政相留於奎婁當以義斷之熒惑往來亾常周歷兩宮作態低昂入天門上明堂貫尾亂宮太白發越犯庫兵寇之應也貫黃龍入帝庭當門而出隨熒惑入天門至房而分欲與熒惑爲患不敢當明堂之精此陛下神靈故禍亂不成也熒惑厥弛俠巧依

勢微言毀譽進類蔽善太白出端門臣有不臣者火
入室金上堂宜以時解其憂凶填歲相守又主內亂
宜察蕭墻之內毋忽親疎之微誅放佞人防絕萌芽
以蕩滌濁穢消散積惡毋使得成禍亂辰星主正四
時當效於四仲四時失序則辰星作異今出於歲首
之孟天所以譴告陛下也政急則出蚤政緩則出晚
政絕不行則伏不見而爲彗第四孟皆出爲王易命
四季皆出星家所諱今幸獨出寅孟之月蓋皇天所
以篤右陛下宜深自改治固不可以戚戚欲速則
不達經日三載考績三考黜陟加以號令不順四時

既往不咎來事之師也臣聞五行以水爲本其星玄
武婺女天地所紀終始所生水爲準平王道公正修
明則百川理落脈通偏黨失綱則踊溢爲敗書云水
曰潤下天下有道則河出圖洛出書故河洛決溢所
爲最大今汝頽畎澮川水漂踊與雨水並爲民害此
詩所謂爆爆震電不寧不令百川沸騰者也其咎在
於皇甫卿士之屬唯陛下留意詩人之言少抑外親
大臣臣聞地道柔靜陰之常義也地有上中下其上
位震應妃后不順中位應大臣作亂下位應庶民離
畔震或於其國國君之咎也四方中央連國歷州俱

動者其異最大間者關東地數震五星作異宜務崇
陽抑陰以救其咎固志建威閉絕私路授進英雋退
不任職以疆本朝夫本強則精神折衝本弱則招殃
致凶爲邪謀所陵聞往者淮南王作謀之時其所難
者獨有汲黯以爲公孫弘等不足憚也弘漢名相於
今亾比而尚見輕何況亾弘之屬乎故曰朝廷亾人
則爲賊亂所輕其道自然也天下未聞陛下竒策固
守之臣也語曰何以知朝廷之衰人人自賢不務於
通人傳曰土之美者善養禾君之明者善養士宜少
抑外親選練左右舉有德行道德通明之士充備天

官於時定陶太后以帝祖母通請謁恣驕傅晏爲大司徒衛將軍丁明爲大司馬驃騎將軍是日日食詔舉方正直言時涼州刺史杜鄴以病免家居舉方正對策今諸外家並侍帷幄布列在位積貴之勢非希見聞乃並置大司馬將軍之官當拜之日曉然日食不在前後臨事而發欲令昭昭以覺聖朝指象如此殆不在他上悟收晏印綬罷歸第光武初興天命告饗昆陽之戰大雷風助威滹沱冰合鄖鄆烈風影響表著而是時五星失晷天時錯謬辰星太白出入過度熒惑進退見熊填星繞帶天街歲星不舍氐房於

是諸不逞之徒咸以爲漢不再興之效獨扶風蘇竟
以爲是皆當於其分野占之房心宋分東海是也董
憲當之尾爲燕分漁陽是也彭寵當之太白辰星自
亾新之末失行至今或守東井或沒羽林或裴回藩
屏或躡躅帝宮或經天反明或潛藏久沈或衰微闇
昧或煌煌南北或盈縮成鈎偃蹇不禁此皆逆亂未
平大運蕩除之兆也賊臣亂子往往指麾妄說傳相
迷誤則是天文安得而遵度哉夫仲夏甲申是爲八
朏春三月己巳丑夏三月甲申壬辰秋三月己亥丁未冬三月甲寅壬戌爲人犯上帝閼
塞之將也主退惡攘逆天有白虹自子加午廣可十

丈長且半天正臨黎丘之地爲秦豐所都月入于畢
畢爲天網主罔羅無道之君秦豐當之又甲申之夜
流星狀似蚩尤旗或云天搶出奎西北行至延牙營
上散爲數百而滅爲延牙破之象漢爲火德雖昧必
亮比卦部歲德在中宮刑在木木勝土刑制德爲兵
事畢中國安寧之效已皆果然其後天下既定天子
躬政頗以吏事課三公時傷嚴急中大夫鄭興上疏
言頻年日食多在晦先時而合皆月行疾也日若象
月臣象君亢急則臣促迫故月行疾今陛下高明而
羣臣惶促宜垂意洪範留思柔克之政和帝初竇太

后臨朝大將軍憲兄弟作威慙用事地震水旱頻起
四年夏四月朔日食軒轅左角爲貴戚占司徒鴻上
疏言昔諸呂握權繼嗣幾移哀平之末國統中絕今
天下遠近背王室而向私門上威損而下權盛徵表
嚮著日爲之食雖有隱謀神照其情夫禁微則易救
大則難恩不忍誨義不忍割去事之謬未然之明鏡
也宜因大變改正匡失以塞天意是月竇氏誅安帝
之世耿貴人兄寶監羽林車騎閻皇后兄顯弟景耀
並典禁兵而宦者樊豐江京李閨乳母王聖聖女伯
榮等出入宮掖爲侈虐而山崩地震司徒震諫不聽

力疏言臣備位台輔不能調和陰陽冬十二月京師
地動其日戊辰月日干支皆土位在中宮此中宮近
臣持權用事之效惟陛下奮乾剛之斷抑驕侈之臣
以承天戒不聽而震以謹歎順帝起幽廢在位既誅
豐顯等而怠荒於政罔念聞封乳母宋娥爲山陽君
封皇后弟冀爲襄邑侯天下失望陽嘉二年以災異
徵安丘郎顥詣公車策問之顥對言易天人之應曰
君子不思導利茲謂無澤厥災火又曰上不儉下不
節炎火並作燒君室去歲冬恭陵百丈闕災殆民勞
不息而營繕者衆也臣愚以爲諸官殿官府離宮別

觀所繕修者可並省減以息困窮又正月以來陰閼
連日今月十四日乙卯白虹貫日易內傳曰久陰不
雨亂氣也蒙之北也蒙言若臣上下相冒亂也又曰
序賢進士後有喜反之則白虹貫日以甲乙日見者
咎在中台又曰賢德不用厥罰常陰夫十室之邑必
有忠信率土之濱豈無忠賢賢者化之本雲者雨之
具得賢而不用猶久陰而不雨此白虹之所以表也
宜采納賢臣以宣助聖化臣竊見立春前後溫氣應
節頃前數日寒傾彌甚冰旣解旋令正月自三日至
十九日於卦爲三公夫天地之氣寒暑相避以成物

也今立春之後火卦用事當溫而寒違反時節由功
賞不列而刑罰必加也恭陵火灾主名未立多所收
捕夫火爲天戒以悟人君可順而不可逆可敬而不
可慢伏案飛候參察衆政立夏之後必且有震裂涌
水之災陛下宜恭已內省諸所考案當須立秋夫三
公上應台階股肱翼戴以燮調爲其職者也政反其
道而寒陰反節三公當之矣今之在位競托高虛納
累鍾之奉忘天下之憂違災稱疾偃仰自逸一被冊
文得賜錢者起矣何疾之易而愈之速也以此消伏
災情興致昇平其可得乎今選舉牧守委任三府長

吏不良歸咎州郡、州郡有失、豈得不責歸舉者、而陛下宗之彌優、臣下慢之愈甚、所謂大綱疎而小綱密促也。臣竊見去年八月熒惑失度、歷涉輿鬼、環繞軒轅、易傳曰政悖禮失、不從夏令、則熒惑失行、禮天子一娶九女、今宮人侍御、動以千計、生而幽隔、鬱積之氣、上感天和、故遣熒惑入軒轅、出后星北垂象見異、以悟主上、今皇胤多天嗣體、莫寄咎宜出此、宜簡出宮女、聽其嫋嫁、以承天意、臣竊見去年閏十月己丑夜、有白氣從西方天苑趨參左足入玉井、數日乃滅。

春秋

日有星孛于大辰、大辰者參罰也、又火爲大

辰北極亦爲大辰，言辛一星而連三宿也。凡中宮無
節政教亂，道歲武衰微，此三星應之，參罰爲白虎主
兵。其國趙魏變見西方，亦應三輔臣，恐立秋而後，趙
魏西閹將有羨寇之變也。宜豫宣諸郡，敬授人時，輕
徭薄賦，選賢能以鎮撫。五月丙午遣太尉服干戚建
旛旗書玉版之策，引白氣之異於西郊，又自去年十
月癸亥太白與歲星合於房心，太白在北，房心在南。
光赤及交房心者，帝之明堂也。歲星守之，年穀豐。今
太白從之，金木相賊而反同舍，此以陰陵陽臣下專
權之異也。又房心主東方，國主宋。石氏經曰：歲星出

左有年出右無年今金木俱東歲星在南是謂出右
恐年不順成宋人饑也書奏拜郎中辭病不就是歲
四月京師地坼夏旱秋鮮卑入馬邑城破州郡兵明
年西羌寇隴右畧皆如顛言上以地坼故引敦撲士
對策太史令張衡對以爲禦者威分震者民擾願陛下
思稽古率舊勿令刑德八柄不由天子漢安二年
夏五月丁亥辰星犯輿鬼占爲大器六月乙丑熒惑
犯填星占爲上人忌而順冲繼崩明年春三月癸丑
熒惑入輿鬼夏四月辛巳太白入輿鬼占皆爲大器
五月庚戌太白犯熒惑占爲逆謀而質帝以暴奔先

是永和六年二月丁巳彗星見東方指營室及墳墓
丁丑在奎癸未歷輿鬼柳七星張光炎及三台至軒
轅中而滅後五年以地震冊免太尉喬尋與太尉固
並見殺於是星孛天市一歲間日食地震山崩成梁
氏之誅其後桓德益昏宦者所在暴縱與海內公忠
之臣相爲讐疾太尉蕃每有選舉論議往往以中詔
謹平原襄楷奮詣闕上疏言竊見去歲五月熒惑入
太微出端門不軌常道其閏月庚辰太白入房犯心
小星震動中耀中耀者天王傍小星者太子太微帝
庭五帝之坐也而火金罰星得揚光其中於占爲天

子凶又俱入房心於法無繼嗣今年歲星久守太微逆行西至掖門還守執法歲木精好生惡殺而淹留執法久不去者咎在仁德不修而誅罰太亟之故也前冬大寒柏傷竹枯臣聞於師曰柏傷竹枯不出三年天子當之今洛陽城中人中夜無故呴呼云有火光人聲於古與竹柏枯同自春夏來連有霜雹大雨電此臣下作威作福刑罰急刻之所感也平原太守墳南陽太守墳志降姦邪而遽加考逮三公乞哀而嚴被譴讓漢興以來未有拒諫誅賢用刑窮謬如今日者天變孔亟而陛下以如是之政刑應之可爲寒

心今年夏四月有河清之祥臣以爲河者諸侯位也
清者屬陽濁者屬陰河當濁而反清陰欲爲陽之象
易傳曰河水清天下平今天垂異地吐妖人厲疫三
者並極而有河清猶春秋麟不當見而見孔子書之
爲紀異也願賜清問盡所言書奏不省霧帝初竇太
后臨朝父大將軍武大傅蕃同心輔政爲宦官所構
戮死遷太后南宮天下疾憤明年夏天雷電以風有
青蛇見御座上中郎將張奐上書言昔周公避位居
東天動明威以彰其德今武蕃忠貞未被明宥此天
疾威妖眚之所以作也宜急改葬徙還其家屬及從

坐禁錮者，皇太后雖居南宮，而恩禮不接，宜思大義。顧復之報，上深嘉其言，而爲宦者所制，不得行已。復治鈞黨，天下賢士懼焉。於是大異爻見，天子乃詔議郎，邕問消復之術。邕具對言：詔問六月二十九日，有黑氣墮溫德殿東庭中，黑如車蓋。降氣奮勢，五色有體，長十丈餘，狀似龍似虹。蜺以臣所聞演孔圖曰：蜺者，斗氣之精也。天投蜺，主惑於譽毀。合誠圖曰：天子外苦兵，內舊臣無忠意者，陛下闢櫳之內，袵席之上，獨有以色見進凌尊踰制者乎？若羣臣有所毀譽，而聖意低回，未知所當也。宜抑內寵，任忠直，決毀譽，使

貞邪各得所守。詔問正月三日有白衣人入德陽殿。
問辭稱梁伯夏殺我上殿中黃門與語言往來不得
入遂亡去。臣聞凡人怪皆皇極道失下或謀上孝成
時有男子王褒冠小官帶劍入北司馬殿東門上殿
入室解惟組佩之收考褒故公車卒病狂不自知入
官所言下獄死與今事正類。伯夏故大將軍冀冀子
不疑子也以罪受戮非天所祐况今將有狂狡爲王
氏之禍乎。柳羣陰太隆羣小並進強盛也。詔問南宮
侍中寺雖雞化爲雄眉已似雄頭尚未變謹按凡雞
爲變皆貌正失也夫牝鷄雄鳴尚致家索况陰陽易

體於實政變此其異甚大獨頭爲元首變未至頭而
明主知之訪問其故此有其事而不遂成之象若應
不精誠頭冠或改卽成患矣敬慎威儀動作之容斷
壅御圖新政則其救也詔問卽阼以來頻歲日食地
動風雨不時疾厲流行迅風折樹河洛盛溢臣聞陽
微則震思亂則風貌失則水視闇則疾厲簡宗廟上
不潤下則河流滿溢有一於此皆爲咎徵况並時雜
至其異彌大明君抑陰尊陽正上下之分致虔於供
御則其救也詔問熒惑變色入太微西門而太白正
晝見臣聞熒惑主夏以非其月入尊宿法臣謀不端

雜識數家言近支碎矣。占五胡之亂、腥羶中土，獨應在太白畢昴，則知兩戒之表，固天之所以限夷夏哉。曹魏青龍中，張掖水溢涌寶石負圖象靈龜立水西有石馬七及禽獸諸星宿之象。有文曰大討曹。詔班天下，以爲嘉瑞。鉅鹿張璡曰：漢亡久矣，魏豈襲作殆將來之兆乎？而是時魏主歎好治宮室，刑峻嚴，崇華殿，災詔問太史令高堂隆曰：此何咎也？隆對曰：易傳曰：上不儉，下不節，孽火燒君室。又曰：君高臺火爲災，蓋役作繁，與百姓空竭，天廕之旱火從之也。魏主默然已。又問漢柏梁災，大起宮殿以厭之。有諸？對曰：有

之此越巫之諱也。天災可敬也，不可倣也。誠罷役清其地，毋更作。及隆疾病，猶口占疏言黃初之際天兆其戒異類之鳥長育燕巢此大異也宜防鷹揚之臣於蕭牆之內選諸王使典兵墓峙鎮撫畿夏時魏疎忌骨肉而委政司馬氏故隆懇懃及之魏甘露中有黃龍見寧陵井中羣臣以嘉祥賀時司馬昭旣廢主擅國魏主髦太息曰龍君德也上不在天下不在田而辱在井中何謂嘉祥賦潛龍詩以自傷已而有南關之難晉旣平吳有青龍見武庫井中武帝往觀之喜百官請賀僕射劉毅白昔龍漦夏庭禍發周室龍

見鄭門子座不觀，又何賀焉。乃止。永康之元尉氏兩
血妖星見南方，太白晝見，而太子適以廢。氐星孛于
奎，至軒轅太微，經三台大陵，而中台星坼。軒轅者，后
宮太微帝庭三台三公奎爲魯，爲庫兵大陵爲積尸
氐器之事，無何武庫火，西羌反，賈后以弑太后楊氏。
誅氐司空華僕射顧與焉，亦竟成趙王之誅。永寧之
元，自春正月至十三月，五星互經天，縱橫無常。永嘉
中，熒惑犯帝微白虹貫日，日光散，四流如血。日中若
有飛燕者，建興二年春正月己巳，黑霧五日，辛未日
墮於地，有三日相承出西方東行，有流星墮平陽北。

光燭地化爲肉長廣三十步諸大異皆古所未有而是時諸王相屠懷愍二帝廢執仗平陽羯胡氏羌交毒於中國亦載籍未有也其後太白入東井而秦弑其君生東井秦分也秦伐燕克壘關中胤歎之曰鄭其亾乎昔越得歲而吳伐之卒受其凶今福德在燕而秦克焉雖克能無復乎燕之復建不過一紀後三年夏彗出尾箕十丈經太微掃東井至於冬不滅尾箕燕分也後十二年秦伐晉羣臣諫不聽在衛率石越曰今福得在吳而伐之必有天殃且彼據長江之險賢能爲之用民爲之使殆未可伐也秦王堅曰天

道未易知以吾之衆投鞭於江足斷其流人何所得恃乎昔吾滅燕亦犯歲而克臺史何渠言也卒伐晉已困於晉而燕竟亾秦太元末長星見自須女至于哭星時晉孝武嗜酒好內心惡之於華林園舉酒祝之曰長星我勸汝一盃酒自古何嘗有萬年天子耶須女媧女也虛爲啜泣之事明年貴人張氏弑帝於清暑殿義熙中熒惑在匏瓜中忽亾失所在法當入危亾之國爲民謠訛言魏主嗣心畏之召名儒與太史所詣司徒浩曰其入秦乎魏主問曰何謂入秦

在庚午辛未二日間庚午主秦辛爲西夷故曰入
秦後八十餘日果出東井守鈞已久之乃去是歲秦
大旱昆明池水竭明年童謹訛言並作中歲而秦亡

劉裕伐滅之

其後彗出天津入太微經北斗絡紫微八十

餘日而滅魏主嗣大畏之復召諸儒生問其祥崔浩
曰是王莽篡漢之表也國家主尊臣卑民無異望晉
室陵夷權命擅國危亡不遠彗之爲異其劉裕乎又
明年長星出竟天而宋果代晉晉中國之舊也魏古
太白昂浩諱之故云梁普通六年夏五月己酉太白

晝見六月經天其明年太白化歲星在牛占爲易政

武帝爲改元肆眚是秋月墮填星者再占天下無王
有大器帝捨身同泰寺禳焉是年太子薨大同五年
彗出南斗東南指至婁而滅又三年熒惑再守心太
白晝見而帝竟歿於臺城之圓北齊之亂歲星犯太
微上將填星犯井鉞與太白并占爲大臣戮而齊殺
元魏宗室四十餘家尚書令楊遵彥東西二族覆焉
周之亾也太白辰星與歲合在井占曰是謂絕行國
內常有兵器改立侯王其明年有流星一大如三斗
器出太微端門流入翼色青白光燭地有聲占有立
王若徙王隋以受命開皇五年秋星流四散下而平

陳仁壽四年六月庚午有星入于月七月乙未日青無光而上疾以暴崩大業三年長星見西方竟天犯奎婁角亢而沒九月見南方亦竟天凌角亢掃太微帝座經歲乃滅占曰是天所以去無道建有德也見久者災深也星大者事鉅也行遲者期遠也後十二年秋八月有星大如斗流于辰閣道間聲如隕墜癸丑有大星如甕流羽林燭如江都明年夏五月辛亥大流星如甕墜江都燭帝獄諸王及幸臣並戮而隋亡